


# Preschentaziun communabla a la staziun da Turitg

Pro Grigioni Italiano e Lia Rumantscha fan attent a Turitg a las consequenzas da No-Billag

DAD ANDREAS CADONAU / ANR

■ **Communablamain s'engaschan las organisaziuns rumantschas e la Pro Grigioni Italiano cunter l'iniziativa No-Billag e quai a Turitg. L'emprim da favrer en represchentants da las minoritads grischunas preschents a la staziun principala da Turitg cun musica ed infurmaziuns.**

In meglier lieu che la staziun principala da la citad da Turitg na dattia probablamain betg per sa scuntrar cun glied. Millis da personas traversan di per di la halla gronda da la staziun per midar tren, sin via en u davent da la citad. En quel lieu en l'emprim da favrer 2018 represchentants e represchentants da la Rumantschia e da las valladas dal Grischun dal sid preschents per far attent il pievel da la Bassa a las consequenzas da l'iniziativa No-Billag per las minoritads linguisticas grischunas. Da la partida sper la Pro Grigioni Italiano èn la Lia Rumantscha cun sias organisaziuns affiladas da las valladas rumantschas grischunas, l'Uniuin rumantscha da la Bassa, la GiuRu, Pro Svizra Rumantscha, l'Uniuin litteratura rumantscha e la Quarta Lingua. Ils fils en chaussa scuntrada a la staziun principala tra la manadra da la cultura tar la Lia Rumantscha *Gianna Olin-da Cadonau*. Ella ha explitgà che las activitads durant il suentermezdi da l'emprim da favrer na sajan anc betg planisadas en mintga detagl. En scadin cas veglian ils Rumantschs e lur cumpatriots da lingua taliana contactar passantas e passants e far attent a las consequenzas da la iniziativa No-Billag. Cun quella chaschun vegnian era repartids flyers ch'intimeschian votantas e votants da vuschar na cunter l'iniziativa No-Billag en votaziun ils 3 da mars. Cadonau è natiralmain satisfatga ch'igl è reussì da retschai-ver la lubientscha dad organisar l'event



**Rumantschs e Grischuns da lingua taliana vulan infurmar a la staziun da Turitg davart las consequenzas da l'iniziativa no-billag per las minoritads linguisticas grischunas.**

FOTO: A. BOSSI

en la halla da la staziun principala da Turitg.

## Cun preschentaziuns musicalas

Las minoritads linguisticas grischunas na repartan betg sulet fepls sgulants cun parolas da votaziun als passants da la sta-

ziun da Turitg. Planisadas èn diversas preschentaziuns musicalas. Tge furmaziuns che sa preschentan l'emprim da favrer a la staziun n'è anc betg dal tut-fatg cler. Senz'auter pussaivel ch'era furmaziuns betg rumantschas èn da la partida e contribueschan e solidarise-

schan cun la champagna cunter No-Billag. Da la partida l'emprim da fevrer è l'organisaziun da la giuventetgna rumantscha, la GiuRu. Il president *Wolf Candrian* è actualmain londervi da recrutar persunal. El ha discurre da circa 40 personas che sajan necessarias per

l'event, personas prontas da contactar passantas e passants e da dar pled e fatg davart las minoritads linguisticas grischunas e da far attent a las consequenzas da l'iniziativa per quella part da la populaziun. Il resun sin l'acziun saja fetg bun, ha Candrian explitgà, dentant na saja il dumber da 40 personas anc betg cuntanschi. Personas interessadas da far part da l'inscunter a Turitg san s'annunziar via [giuru@giuru.ch](mailto:giuru@giuru.ch)

## Interess comunabels

Per il secretari general da la Pro Grigioni Italiano, *Giuseppe Falbo*, èsi cler che l'organisaziun da la populaziun grischuna taliana s'engascha encunter l'iniziativa No-Billag. E quai betg sulet a chaschun da l'acziun planisada a la staziun da Turitg. Falbo ha fatg attent a la festa da la cultura cun il medem intent che ha lieu ils 3 da favrer a Cuir. El ha menziunà ils interess comunabels da la Rumantschia e da la populaziun da las valladas grischunas dal sid da mantegnair las taxas da radio e televisiun che segireschian ina purschida mediala en l'atgna lingua. Il secretari general da la Pro Grigioni Italiano ha fatg attent a las prestaziuns dad RSI, l'emettur da radio e televisiun dal Tessin che serva medemamain a la populaziun da las valladas talianas grischunas. Falbo ha discurre dad ina gronda prestaziun da contribuziuns da la taxa da radio e televisiun davart da la Svizra tudestga en favur da la populaziun da lingua taliana. Senza quests daners na saja in purschida da medias publicas en lingua taliana betg pli pussaivla. En quel senn sajan la Rumantschia sco la part grischuna da lingua taliana pertutgadas medem da la iniziativa, ha il secretari da la Pro Grigioni Italiano declerà l'engaschi comunabel da sia organisaziun cun la Lia Rumantscha.